

## 每週經課朗誦經文(巴克禮台語漢字)2014/01/12

### 共同經課 - 1

#### 以賽亞書四十二章一節~九節

1 看啊，我的奴僕——我所扶持的，我所揀選的、我的心所歡喜者！我有將我的神互伊；伊欲將公理傳互外邦。2 伊無喧嘩，無出聲，亦無互街路裡聽見伊的聲。3 受傷的蘆葦，伊無遏折；欲熄的燈火，伊無拍熄。伊照真實將公理傳報。4 伊無清心，亦無失膽，致到伊佇地上設立公理；海嶼攏聽候伊的教示。5 耶和華上帝，創造諸個天來展開伊，開闊地及伊所出的，用活氣互地上的眾百姓，用神魂互行佇彼頂面的人的，講：6 我——耶和華用公義召你，欲牽你的手，保守你，互你做百姓的約的中保，做外邦人的光，7 來開睛暝的目矙，導受關者出監，互踏佇黑暗者出監牢。8 我是耶和華，這是我的名；我無將我的榮光歸互別個神，亦無將我的名聲歸互雕刻的偶像。9 看啊，前的事已經成，今我亦欲將新的事講明，諸個事未發起以前，我就講互恁聽。

### 共同經課 - 2

#### 詩篇二十九篇

1 〔大衛的詩〕大權能者的子啊，恁著將榮光、氣力歸互耶和華，歸互耶和華！2 著將耶和華的名所應該得著的榮光歸互伊，用聖潔的妝飾敬拜耶和華。3 耶和華的聲佇水面；榮光的上帝起雷，耶和華佇多多水的頂面。4 耶和華的聲有大氣力；耶和華的聲滿滿威嚴。5 耶和華的聲拍折柏香樹；耶和華拍碎黎巴嫩的柏香樹。6 伊亦互伊越跳親像牛仔，互黎巴嫩及西連越跳親像野牛的子。7 耶和華的聲互火焰分叉。8 耶和華的聲振動曠野；耶和華振動加低斯的曠野。9 耶和華的聲互鹿母驚著來生子，亦互樹林的樹葉落光光。見若佇殿內者，攏講榮光。10 大水氾濫的時，耶和華坐啲做王；耶和華坐啲做王，直到永遠。11 耶和華欲賞賜氣力互伊的百姓；耶和華欲用平安賜福伊的百姓。

### 共同經課 - 3

#### 使徒行傳十章三十四節~四十三節

34 彼得給伊講：「以尼雅，耶穌基督醫好你啦，起來！你的舖仔家已整頓。」伊連鞭起來。35 見若住佇呂大及沙崙的人看見伊，就歸服主。36 佇約帕有一個女徒，名大比大，翻譯就是多加；行好事及賑濟滿滿。37 當時，破病死，人洗伊的身屍，下佇樓頂。38 呂大近約帕；學生聽見彼得佇遐，就差二人去尋伊，求講：「請來阮遮，毋通延延。」39 彼得就起身及in去；已經到，導伊上樓。眾守寡人倚佇彼得的身邊啲哮，將多加及in佇啲的時所做的衣服互伊看。40 彼得就教眾人出去，跪落去祈禱，越轉身向身屍講：「大比大，起來！」伊的目矙展開，看見彼得，就起來坐。41 彼得伸手扶伊起來，叫諸個聖徒及守寡人入來，將復活的多加交互in。42 通約帕攏知，就有多多人信主。43 彼得佇約帕久久及一個鞞皮師傅西門相及住。

### 共同經課 - 4

#### 馬太福音三章十三節~十七節

13 彼時，耶穌對加利利到約但，就近約翰，欲對伊受洗禮。14 若是約翰阻止伊講：「我合該對你受洗禮，你反轉就近我嗎？」15 耶穌應伊講：「今請允我，因為咱合宜著按呢來盡攏總的義。」就允伊。16 耶穌已經受洗禮，連鞭對水上來。天忽然為著伊開，伊就看見上帝的神親像鴿仔降臨，佇伊的頂面。17 閣對天有聲講：「此個是我疼的子，我所歡喜的。」